

Fesche Mama

Hea zua fesche Mama
Heit kimm I hoam zua dia
I war zen Dog undawegs
Rom, Paris un Helsinki
Jez bin I hi!

Frag mi ned was I da gfarn hab
I woas seiwa ned genau
Kohle hods im Voraus gebn
Un am gschengdn Gaul schaud
Ma ned ins Maul

Sag ned I soi mit de Kinda spuin
Dafüa bin I vui z' müad
I wui blos deine Schenkl spüan
Und in deine Middn vaglüan

Hea zua fesche Mama
Heid kim I hoam zu dia
Un moing konsd du zum shoppen geh
Weil ab heid da samma reich

Wudumond

I starr' in die Finsdanis
Keazn san längsd aus
Du bisd scho ewig lang fuad
Aba dei Gruch hängt no im Haus

Mei Heaz schlogd wia a Hamma
Un da Wind rüddld am Haus
Nadl in da Bubbm
Un da Schweiß brichd ma aus

Heid is wieda Wudumond

Meine Narbm brechan auf
I ko ned schrein, bin taub und
schdumm
A Schbinna sizd ma im Gnack
Un de Raddn rennan rum

Pantsching Boi

Wia mia uns damois ogschaugt ham
Da is was explodiert
Dass I net grad da schönste bin
Des hat di net scheniert

Aber irgendwas laaft jez schiaf
Weil du sagst das aus un gar is
Un das I dia nimma gfoi
Und I moi scho dei Gsicht
auf mein neia Pantsching Boi

ganz allmällich hosd dan
ehrlich gsagd wasd von mia hoidsd
vom meim Gwand und meina Art
von meim Bauch und von meim Bart

hab locka 30 Pfund valorn
drainierd ois wia a Schdia
zum Essn hods blos Greazeig gem
koane Nudln un koa Bia

Jez war I da Mo
Wia a pasd häd in dein Zoo
Aba du haust blos de Tüa zua
Un farst einfach davo

Drommen von Afrika

Es is fünfe in da Früa
Un de Straßn san jez endlich lea
I ziang am Siegestor vabei un gib Gas
Jez kumd ma koana mea quer
De Sonna geht auf
Aba I muas abbiagn in Wesdn naus

Und I dram davo wie I obifar
Üba d' Berg obi bis nach Genua
Wo da Wind übas Meer
De Drommen waht von Afrika

In da Hansastrass de Blonde
Midm Ledarock winkt ma no zua
I brems ned ab
Weil di dad ma heid aa ned guad
Des is ned des was I brauch
Des tragt mi ned weid gnuu fuat

Weil I dram davo wie I obifar ...

Un I biag in d Garasch ei, es is Schicht
Jez is da Dagfara dro
Des was I heid nachd reigfarn hab
muas langa das I d Miede zoin ko
Und beim Geidzähl foin ma d Augn zua
I bin total neba da Spua

Weil I dram davo wie I obifar ...

Seiwe oide Gschichd

Kennsd du des süasse Ziagn
Wen die' Frau ian Rog häha schiabd
Dann bisd genau so weid
Wia da Koda der bei da Nachd drausn
schreid

Und wia a jeda Mo
vadrast die Aug'n und Knia wern da
weich
Des is die selbe oide G'schicht
und de is jedes mal wieder neu

Und du drasd schia duach
Wen des lezde Fezal Schdoff weg is
Des is di seiwe oide Gschichd
Bei der jeda Bfarra sei Bredigd vagissd

Des is des seiwe oiwei des seiwe
Was oan hoas machd, was oan queid
Auf dera ganzn weidn Weld
Oiwei des seiwe

ZEIT ZUM AUSZIAG'N

Zeit zum Ausziag'n
I bin scho vui z'lang in dem Haus
Zeit zum Ausziag'n
Da san scho vui z' vui Gspensta im Haus
I moan I woas net wohi
Hauptsach is I bin a moi draus

Wenn I z' lang an oam Fleck bleib
Dann papp I fest
Dann wird die Luft so dick
Dass I moan I dastick

Des ist wurscht wo I hikimm
I war scho immma froh
Wenn I net blieb'n bin
Weil des wo I dahoam bin
Da find I in dem Leb'n nimma hi
I glab da find I nimma hi

I mach de Tüa zua
Drah mi net um
Mach de Tüa zua
Woas genau dass I nimmer herkom
I will's nimma hör'n
Was de Gspensta vazäl
Wui nix mehr seh'n
Blos no furt von dem Haus

Sekänd Händ Blues

I war nia auf da Beale Street
Und a net in New Orleans
War a net in Chicago
Und Baumwoi ken I blos ois Jeans
I bin in München oid worn
I hab an sekänd händ blues

I war nia beim Mardi Gras
D' Wiesn is mir scho Sach gnuu
Wia da Muddy King Bee xunga hat
War I a kloana Bua
Im Radio hat's blos Freddy gem
Da kriegst an sekänd händ blues

I war nia im Gfängnis
Und I hab a selten grafft
Desweng kon I net vasteh
Dass mia a jede davo lafft
Oiso ge vazähl ma koan Schmus
I hab an sekänd händ blues

I war nia down at Theresa's
War nia im House of Blues
Hoit vom Alfonsos nauf ins Hide out
Und üba's Brückerl wieder z'ruck
Des is da Münchna Verdruß
Mit'm sekänd händ blues

I hab nia richtig Hunga g'habt
Höchsten in meim Heaz
Dass meine Daschn meistens leer warn
Des hab I scho vaschmerzt
Aba wenn I an Mosi in Giasing cruisen seng hab
Na krieg I heid no an sauban Blues

I hab höchstens moi im Lotto gspuit
Nia Poker oder Roulette
War a Zeit im Norden
Des war scho a recht nett
Blos wenn in Pasing de Sonna untageht
Krieag I mein sekänd händ blues

Gmade Wiesn

Wenn I im Auto sitz
Na dram I dass I Zug fahr
Wenn I mim Zug fahr
Na dram I dass I fliag

Wenn I dahoam hock
Na dram I dass I fuat war
Wenn I dann fuat bin
Dann dram I von dahoam

I woas scho, I woas net was I wui
Und I sag das, des is a saudumms Gfui
Wenn si ois oiwei im Kreis umdraht
Und übaoi wo'sd hikimst
Is de Wiesn scho gmad

Mog net in Süden
Weil der Fön macht mi so fad
Mog net in Norden
Wo da Wind so grausig wat

Mog net in d Stadt geh
Des ist ois so übadrat
Mog net am Berg geh
Weil da is ma wieda z' stad

I woas scho, I woas net was I wui
Und I sag das, des is a saudumms Gfui
Wenn si ois oiwei im Kreis umdraht
Und übaoi wo'sd hikimst
Is de Wiesn scho gmad

Wenn I aloa bin
Dann dram I du warst do
Und wenn du da bist
Dann dram I mi davo

I woas scho ...

Da Nachbar

Kim I hoam um halba viere in da Nacht
Wo normal a jeda schlaft
Vor meina Haustüa steht da Notarzwag'n
,s Blaulicht zuckt so kalt bis nauf in 4. Stock
Koana macht an Mucks
Koana schaut zum Fenster raus
„Gottseidank dass I koan Dokta ned brauch“

Türen klappen, oana fluacht im Stiegenhaus
Des wird doch net ganz oben bei mia sei?
D' Sanitäter meutern „Herrgott is der schwer“
Tatsächlich trag'n de jetzt mein Nachbarn
naus
Kasweis flaggt er da, seine Schnaufer san
vui z' kurz
Wia's ,n neischiabn winkt er mir no zua

I beug mich hin zu ihm er flüstert ma ins Ohr
Ob I dawei sein Kater fuadan dat?
Da Doktor schiabt mi weg: „Gengas auf d'
Seit'n es pressiert“
Und dann geht d' Sirena a scho o
Logisch sag I mach da koane Sorgen
zwengs dem Viech
Schaug liaba dass d' bald wieda auf d' Füaß
kimmst

DU WOASD NED WER I BIN

Ge doch bitte hi
Heb doch endlich ob
Du woasd doch dass des I bin
A wennst ned woasd wer I bin

I sieg dei Siluedd'n
Jedn Omd im Dämmaliachd
Du ziagst di aus und I wie die Numma
Weil I hoids boid nimma aus

Geh doch bitte hi . . .

I woas ned wia du redsd
I woas ned wie du riachsd
I woas blos dass mia zwoa zsamma
ghean
A, du werst as scho no seng

Geh doch bitte hi . . .

Endlich is soweid
I hör die zarte Schdimm
Sie sogd: Schbanna, Wixa, perverse
Sau
Und ob I völlig schbinn

Geh doch bitte hi . . .

De warn gschead

De war'n gschead
Vom ersdn Dog o gschead wia d' sau
De war'n gschead
I moan mein Vadda un sei Frau
Und I hab gleand:
Du derfsd nix und neamand drau'n

Drum gib da blos koa Müa
Weil du konsd nia des spüan
Des was I spüa

Ois war foisch
Ois was I gsgd hab, des war foisch
Ois war foisch
Ois was I oglangd hab war foisch
Ois war foisch
Wenn I wen meeng hab war's a foisch

Drum gib da blos koa Müa
Weil du konsd nia des spüan
Des was I spüa

Des hat zong:
Jeder Schlag aufs Hirn hat zong
Des hat brennd:
Jeder Stich ins Heaz hat brennd
Und I hab gleand:
Du derfsd nix und neamand drau'n

Drum gib da blos koa Müa
Weil du konsd nia des spüan
Des was I spüa

DU WOANSD NIA

Mei hab I gflend
in meim Zimma alloa
Mia hada so so grausd
Vor dem End von uns zwoa
Koa Sonna am Himme
Lauda Woign davo

Du aber danzd
Ois waar' nix bassiert
Du aber lachsd
So hei das mi frierd
I woas du woanst nia
Und wen dan gwis ned weng mia

Und dann schdralst mi o
und sagst „es war schee“
Und das du mi nia
vagesn weast
Hea auf mit dem Schmäh
I kons nimma hean

DIA GEZ GUAT

Dia gez guat hast xagd
In da Frua scho beim aufsteh'
Dia gez guat hast xagd
Wensd am Abend wieda hoam kimst
Du hast endlich oan g'fund'n dea zu dia hoit
De Raten füas Haus san a scho boid zoit
Ex geht da guat hast xagd
Mit dem Grinsen des I no von damois ken

Dia gez guat hast xagd
Du brauchst koa Gramm mehr von dem Gift
Dia gez guat hast xagd
Und dass'd von früara koan mehr trifftst
Mit de ganz'n hart'n Sachan is es längst
vabei
Ab und zua moi an Joint da ist doch nix
dabei
Ex geht da guat hast xagd
Mit dem Grinsen des I no von damois ken

Freili bin I fro wenn's dia a so guat geht
Seltsam dass as Wassa in deine Aug'n gar
a so hoch steht
I hab ma oiwei g'wünscht dass dia a Moi
guat geht
Drum streng I mi a o dass I glam ko
Was du mia da grad a so vazählst

Dia gez guat hast xagd
Dass mia uns troffa ham des hätt di g'freit
Dia gez guat hast xagd
Blos auf an Kaffee da hast jez grad koa Zeit
Du kumst grad aus Lanzerote, da hast
Urlaub g'macht
An mi hast du freili scho ewig nimma dacht
Ex geht da guat hast xagd
Mit dem Grinsen des I no von damois ken

*Mir haben amoi zsam a Flasch'n Wodka aus-
gleert
Oder mehr ko scho sei
Jedenfalls hat er mia vazält er hätt seinerzeit
An Rudi Dutschke kennt und war 68
Überall dagegen g'rennt*

*Da war a des Private no politisch gwes'n
Alle hab'n Marx und Engels gelesen,
aber vielleicht net ois glei verstanden
Springer enteignet – linke faust nach vorn
Jede Woch a Demo gega Vietnam – ho ho ho
chiminch
Und mit de Haschrebellen durch Berlin
Stadtguerilla echte Tupamaros, des glaubst
Und als Roadie bei Ton Steine Scherben*

*In Mutlangen umananda g'hockt
Mit' Böll am Bastian und da Kelly
Gorleben und Wackersdorf sowie so dabei
Aba beim Marsch durch die Institutionen
Im Stadtjugendamt hänga blieb'n
Wo de kids sag'n geh Opa vazähl no a G'schicht
Aus'm 68er Kriag*

Sei liabster Song war von de Stones Street
Fighting Man
A Graserl und an Drink hat a scho aa gern meg'n
Er wollt net lang, liaba kurz und heftig leb'n
I moan allaweil sei Kata wird ma bleib'n

BEVOR I GEH

Ois is wia oiwei
Und nix is bassiert
De Zeit is vaganga
Und jez bin I müad

I bin blos a Sänga
Bei mia gibz nix zum Erbn
Jez kon I mi nacha
Hilegn zum Sterbn

I woit nia a Rolex
Brauch koa Villa am See
Blos im Somma a Sonna
Und im Winta an Schnee

Hab mi oft wegdrat
Hab mi net oft gnua gwert
Aba koa Himmevatta
Ko mir voa Gricht zerrn

Mia hat a oft gstunga
Wia valog'n de Leit san
I hab oft oan drunga
Weil's dann vui netta war'n

Jez wird's glei vabei sei
Drum wünsch I mia oans
Dass du mia die Hand gibsd
Bevor I geh

BLOS IN MEI'M HIRN

Wenn I aloa in da U-Bahn sitz
Dann bild I mir ein
Du wartst scho dahoam auf mi

Des is ois blos in mei'm Hirn
Aba I kann's richtig spüan
Wia's ma kalt, eiskalt
An Buckel abilauft

Wenn I heut nacht nach mir selber g'lang
Dann bild I mir ein
I glangad nach dir

Des is ois blos in mei'm Hirn...

Und wenn I amoi koa Luft mehr kriag
Dann bild I mir ein
Dass I dir an d' Gurg'l geh

Des is ois blos in mei'm Hirn...

51er

I hab ma gschwuan das I ned zrug geh'
Bin an der Greizung linx ab'bong
Wei deine ganzn scheena Schprüch
War'n doch von vorn' bis hindn g'long

Sei blos stad von wegen Draumpaar
Mia warn doch eh wie Katz un Maus
Und I bin imma efda g'frodg woan
Wia hoidsd du den des blos aus

Sei du blos stad von wegen Schicksal
Von wegen Mond im 2. Haus
Von wegen des kannd doch koa Zufol sei
Das mia uns grod in dem Lem droffa ham
Bin blos mim 51er Bus gfarn
Wei mei Karrn beim Richt'n war!